

PAHAYAGAN NG PARTIDO KOMUNISTA NG PILIPINAS  
PINAPATNUBAYAN NG  
MARXISMO-LENINISMO-MAOISMO


# Bayan

Taon XXXII Blg. 1

Enero 2002

## Editoryal

# Di na matagalan ng mamamayan ang rehimeng Macapagal-Arroyo



Mabilis na nahiwalay sa mamamayan si Gloria Macapagal-Arroyo. Sa loob lamang ng ilang buwan, mabilis na lumawak ang disgusto ng mamamayan sa naghaharing rehimen bunsod ng kabiguan ni Macapagal-Arroyo na mapagpasyang harapin ang mga pundamental na suliranin ng mamamayan. Tuluy-tuloy na nahihiwalay ang rehimen sa sambayanang Pilipino dahil sa mga hakbangin nitong tahasang pasista, papet at todo-todong anti-mamamayan.

Nagpapatuloy ang lumalalang instabilidad ng naghaharing reaksyunaryong sistemang pampulitika. Lumilitaw ang iba't ibang indikasyon na nagsasaad na hindi na lalampas si Macapagal-Arroyo sa 2004. Malamang nga na hindi niya matatapos ang kanyang termino at mapupwersang bumaba sa pwesto bago pa man ang 2004. Magiging resulta ito ng pagsasalimbayan at pag-iging ng maraming mga usapin kabilang ang armadong interbensyon ng US, krisis sa ekonomya at kabuhayan, korapsyon at tunggalian ng mga





## NILALAMAN:

- 1 **Editorial:** Di na matagalan ng mamamayan ang rehiimeng Macapagal-Arroyo
- 4 Sumisidhi ang hidwaan sa hanay ng naghaharing uri
- 5 Pagpapatuloy ng usapang pangkapayapaan: Sinasagkaan ng rehimeng Macapagal-Arroyo
- 7 Nanganganib ang pagpapatuloy ng usapan
- 7 **Ang panunumbalik: Armadong panghihimasok ng imperyalismong US sa Pilipinas**
  - (7) Mga tropang Amerikano: Muling nagbabase sa Pilipinas
  - (8) Pagtutol sa pagpasok ng mga armadong tropa ng US, lumalawak
  - (9) MLSA: Bagong katawagan, lumang kasunduan
- 10 **Mga ulat-koresponsal**
  - (10) Di mapagtakpan ang mga pang-aabuso ng 5th ID sa Isabela
- 11 (11) 5th ID, sangkot sa illegal logging  
Mga balita

## PANAWAGAN

Ang Lupong Patnugot ng **Ang Bayan** ay nag-aanyaya sa mga mambabasa na mag-ambag sa pagpapahusay ng ating pahayagan sa pamamagitan ng pagbibigay ng mga komentaryo at mungkahi, mga balita o mga rebolusyonaryong karanasan na maaaring ilathala sa ating pahayagan.

Inilalabas ang AB sa Pilipino, Bisaya, Hiligaynon, Iloko at Ingles. Magpadala ng blangkong *email* sa *address* ng edisyong nais ninyong tanggapin:

[angbayan\\_updates\\_pilipino\\_subscribe@yahoogroups.com](mailto:angbayan_updates_pilipino_subscribe@yahoogroups.com)  
[angbayan\\_updates\\_english\\_subscribe@yahoogroups.com](mailto:angbayan_updates_english_subscribe@yahoogroups.com)  
[angbayan\\_updates\\_bisaya\\_subscribe@yahoogroups.com](mailto:angbayan_updates_bisaya_subscribe@yahoogroups.com)  
[angbayan\\_updates\\_hiligaynon\\_subscribe@yahoogroups.com](mailto:angbayan_updates_hiligaynon_subscribe@yahoogroups.com)  
[angbayan\\_updates\\_iloko\\_subscribe@yahoogroups.com](mailto:angbayan_updates_iloko_subscribe@yahoogroups.com)

reaksyunaryo at pasistang karahasan laban sa mamamayan. Lahat ng ito ay nag-uudyok ng mga pagkilos at paglaban ng mamamayan.

HINDI KAYANG PASINUNGALINGAN NI MACAPAGAL-ARROYO AT ng kanyang mga teknokratang “eksperto” sa ekonomya ang patuloy na lumulubhang krisis sa kabuhayan at kahirapan ng mamamayan. Walang renda ang pagpapatuloy ng mga patakarang dikta ng IMF-WB at WTO. Upang magpabango, sinasalamangka ni Macapagal-Arroyo ang presentasyon ng mga estadistika at nagpapakawala ng matatayog na deklarasyon at pangako sa mamamayan.

Patuloy na bumabagsak ang lokal na produksyong nakatuon sa eksport kasabay ng pagbagsak ng produksyong industriyal sa buong daigdig. Sumisidhi ang suliranin ng disempleyo laluna sa mga industriyang pang-eksport. Walang saysay ang programang “emergency employment” ng reaksiyunaryong rehimen na pawang pansamantala, kontraktwal at di tunay na produktibo ang nililikhang mga trabaho.

Sa kabila ng napakasidhing krisis sa ekonomya, matigas na tinatanggihan ng rehimeng Macapagal-Arroyo ang mga kagyat na panlipunang benepisyong iginigiit ng mamamayan. Ibinasura nito ang panawagan para sa P125 na karagdagang sahod at ang ipinagkaloob lamang sa mga manggagawa noong Nobyembre ay ang mapang-insultong P30 *emergency cost of living allowance*. Wala itong ginagawang hakbangin upang ipatupad ang tunay na reporma sa lupa. Sa halip, ipinatutupad ang mga patakarang pabor sa malalaking dayuhang korporasyon sa agrikultura. Tumampok ang maraming demolisyon ng mga komunidad ng mga maralita upang bigyang-daan ang interes ng malalaking dayuhang korporasyon sa *real estate*.

IPINAKIKITA NI MACAPAGAL-ARROYO NA ISA SIYA SA pinakamasugid na tuta ng imperyalismong US sa kasaysayan ng neokolonyal na republika. Sa kauna-unahang pagkakataon mula noong nakaraang Ikalawang Digmaang Pandaigdig, idineploy ang mga tropang Amerikano sa larangan ng digma sa loob ng teritoryo ng Pilipinas. Paglapastangan ito sa pambansang soberanya at labag ito maging sa konstitusyon ng reaksiyunaryong gubyerno.

Ipinailalim na ng rehimen kapwa ang mga patakarang panloob at panlabas nito sa “digma laban sa terorismo” na pinasimunuan ng US. Lihim na nakipag-usap si Macapagal-Arroyo sa US at pinaspasan nila ni George W. Bush, presidente ng US, ang pagbubuo ng Mutual Logistical Support Agreement (MLSA) na lalong nagpapalakas sa mga



dati nang kasunduang yumuyurak sa pambansang kasarinlan ng Pilipinas. *(Tingnan ang kaugnay na artikulo sa pahina 9.)*

SA UNANG TAON PA LAMANG, NALAG-pasan na ng rehimeng Macapagal-Arroyo ang rekord ng gubyernong Estrada sa mga paglabag sa karapatang-tao. Pinakawalan ni Macapagal-Arroyo nang buong bangis ang reaksyunaryong pwersang militar at pulis upang supilin ang mga paglaban at pakikibaka ng mamamayan.

Sa kanayunan, walang-pakundangan ang mga inilulunsad na kampanyang militar. Sa maraming lugar, isinasantabi na ang dating mga mapagkunwaring “civilian-military operation”. Pinaiiral ang walang-maskarang pasismo at inihahasik ang malawakang terorismo sa hanay ng mamamayan. Patuloy na dumarami ang bilang ng mamamayang napu-pwersang lumikas sa kanilang mga lupang sinasaka dahil sa malawakang mga operasyong militar.

Walang tigil ang mga pagsisikap ng rehimen, sa pamumuno ng mga militaristang upisyal nito, na isabotahe at sagkaan ang usapang pangkapayapaan. Itinigil ng rehimeng Macapagal-Arroyo ang pormal na usapan at pinalitan na lamang ito ng mga impormal na negosasyon para malimitahan ang mga maaaring kamtin ng rebolusyonaryong kilusan mula sa prosesong pangkapayapaan. *(Tingnan ang kaugnay na artikulo sa pahina 5.)*

PARTIKULAR NA NAKAPAGPAPAGALIT SA MAMAMAYAN ang nagpapatuloy at lalong lumulubhang korapsyon laluna sa mga kaso ng pambabraso sa negosyo, mga tiwaling negosasyon at sikretong pakikipagkasundo sa malalaking kroni tulad nina Danding Cojuangco at Lucio Tan at pakikipag-areglo sa kampong Estrada.

Ginagamit ni Macapagal-Arroyo ang burukratikong kapangyarihan katulad ng paggamit dito ni Estrada at iba pang presidente sa nakaraan, upang

mabigyang-pabor ang sariling mga kamag-anak, kaibigan at kasosyo sa negosyo. Sangkot sa mga anomalyang ito mismong si Macapagal-Arroyo at ang kanyang asawang si Miguel “Mike” Arroyo.

SA LOOB LAMANG NG ISANG TAON, NAGIGING malinaw sa malawak na masa na ang rehimeng Macapagal-Arroyo ay walang pundamental na pagkakaiba sa ibinagsak nilang kasuklam-suklam na rehimeng Estrada. Bumabagsak ang popularidad ni Macapagal-Arroyo nang mas mabilis kumpara sa lahat ng nagdaang presidente sa kanilang unang taon. Ipinakikita rin ito maging ng iba’t ibang sarbey.

Sa ginawang paggunita ng unang taon ng EDSA 2, kaunti ang natirang kasama ng gubyrno na nagbunyi. Maraming pwersang nasa likod ng malalaking demonstrasyon noong Enero 2001, sa partikular ang mga organisasyong kaanib ng Bagong Alyansang Makabayan at partidong Bayan Muna, ang humugos sa lansangan upang kundenahin ang sinasabi nilang pagtalikod ni Macapagal-Arroyo sa EDSA 2. Sa pagtatangkang busalan

ang mga sigaw ng mamamayang dumaraing sa pagpapahirap at pagmamalupit ng rehimeng Macapagal-Arroyo, pinigilan ng mga sundalo at pulis ang libu-libong demonstrador na makapagrati sa EDSA.

Ang kanyang walang pakundangang pasismo, todo-todong pagbubukas ng ekonomya at tahasang burukratikong katiwalian, at laluna ang kanyang walang kahihiyang pagkapapet, ay nag-uudyok sa mamamayan na patalsikin ang naghaharing rehimen bago pa ang 2004.

Sa sitwasyong ito, mahalagang ilinaw na ang higit na importanteng salik sa anumang mapayapang pagbabagsak sa naghaharing rehimen ay ang pagbubuo ng pinakamalawak na prente ng mga demokratikong pwersa na singlawak o mas malawak pa sa mga pwersang nagpabagsak kay Estrada noong Enero 2001.

Kinakailangang patampukin ng malawak na

**Ang kanyang walang kahihiyang pagkapapet, walang pakundangang pasismo, todo-todong pagbubukas ng ekonomya at tahasang burukratikong katiwalian, ay nag-uudyok sa mamamayan na patalsikin ang naghaharing rehimen bago pa ang 2004.**



# Lalong sumisidhi ang hidwaan sa hanay ng mga naghaharing uri


**P**atuloy na tumitindi ang mga alitan sa pagitan ng naghaharing pangkating Macapagal-Arroyo at ng pangkating maka-Estrada. Kasabay nito, tumitingkad rin ang mga lamat sa loob ng mismong pangkatin ni Macapagal-Arroyo bunga ng kanilang maniobrahan para sa eleksyon sa 2004.

Sadyang napakaliit na ng mga rekursong maaaring mapayapang paghatian. Dahil dito, mismong ang mga palabigasan ng dating

naghaharing pangkating Estrada ang binubungkal at nais solohin ng naghaharing paksyon. Pinakamatingkad na halimbawa ang pondo ng Philippine Amusement and Gaming Corporation (PAGCOR) at Philippine Charity Sweepstakes Office (PCSO) na regular na kinukurakot dati ng mga Estrada. Iligal na ginamit ng asawa ng presidente na si Mike Arroyo ang pondo ng PCSO para tustusan ang gastos sa eleksyon noong Mayo 2001. Nakikipagkutsabahan na rin ang rehimen sa mga kroni ng mga dating presidente, mula kay Marcos hanggang kay Estrada. Kabilang dito sina Danding Cojuangco at Lucio Tan.

Ang sidhi ng alitan ay umaabot na sa sukdulan. Nasa kagyat na adyenda ng mga reaksiyong grupong anti-Macapagal-Arroyo ang pagpapabagsak sa rehimen. May nagbabanta rin ng paghahalili rito ng isang probisyunal na gubyernong militar-sibilyan.

Kabilang sa mga humanay na laban sa pangkating Macapagal-Arroyo ang ilang pwersang aktibong sumuporta sa EDSA 2, katulad ng Philippine Consultative Assembly (PCA) ►



◀ prenteng ito ang mga isyung anti-imperyalista at ang mga suliranin at hinaing ng masa ng sambayanan, laluna ng masang anakpawis; at hikayatin ang malalawak na pagkilos sa lansangan ng daan-daan libo hanggang milyong mamamayan. Kailangang magbantay sa mga nambubuyo ng kudeta at putsismo na may layuning pangunahan ang inisyatiba at isaisantabi ang lakas ng mamamayan.

Mahalaga ring bigyang-pansin ang paghimok sa mga persohnang nasa loob mismo ng

naghaharing rehimen na makiisa at makilahok sa mga pakikibakang anti-imperyalista at makamamamayan.

Higit sa lahat, kinakailangang palakasin ng mga rebolusyonaryong pwersa, kabilang ang mga pwersa ng Bagong Hukbong Bayan at Moro Islamic Liberation Front, ang armadong pakikibaka sa kanayunan.

Mulat ang Partido at mga rebolusyonaryong pwersa sa kakayahan nito at ng mamamayan na ibagsak ang alinmang reaksiyong naghaharing pangkatin

sa pamamagitan ng mapayapang paraan. Subalit higit sa lahat, upang makamit ang mga pundamental na pagbabago para sa interes ng masang anakpawis, kinakailangang ibag-sak hindi lamang ang alinmang reaksiyong naghaharing pangkatin kundi, sa kalaunan, ang buong sistemang kinakatawan nito. Magagawa lamang ito sa pamamagitan ng armadong pakikibaka na siyang wawasak sa makinarya at istrukturang burukratiko-militar ng buong reaksiyong sistema. **AB**



Pagpapatuloy ng usapang pangkapayapaan

# Sinasagkaan ng rehimeng Macapagal-Arroyo

**S**inasagkaan ng rehimen ang usapang pangkapayapaan sa bawat pihit nito. Sa itinakbo na ng usapang pangkapayapaan, tuluy-tuloy at mahigpit ang pagtutol ng mga militarista sa gabinete ni Macapagal-Arroyo sa muling pagpapatuloy nito. Sa pangunguna nina Defense Secretary Angelo Reyes at National Security Adviser Roilo Golez, dalawang beses na sinuspindi ang usapang pangkapayapaan dahil umano sa pagpaparusa ng BHB sa mga pusakal at berdugong pulitiko. Mahigit kalahating taon na itong suspendido.

Patuloy ding tumatanggi ang rehimen na palayain ang mga bilanggong pulitikal at magbigay ng iba pang kongkretong konsesyon sa rebolusyonaryong kilusan at mamamayan. Maging ang sabayang tigil-putukan noong Kapaskuhan ay maraming ulit na nilabag ng mga reaksiyunaryong sandatahang pwersa. Tuluy-tuloy pa rin ang matitinding operasyong militar sa mga larangang gerilya ►



◀ na binubuo ng mga retiradong upisyal militar at personalidad na maka-Ramos, ang isang bahagi ng RAM-YOU (Rebolusyonaryong Alyansang Makabansa-Young Officers Union) at ang Council of Philippine Affairs (COPA) na binubuo ng mga pwersang malapit kay Jose “Peping” Cojuangco. Nakikisakay sa mga ito ang maliliit na grupong pinamumunuan ng mga oportunistang taksil sa rebolusyonaryong kilusan.

Mula pa Oktubre, nagsimula nang humanay ang mga ito laban sa rehimeng Macapagal-Arroyo at nagpaugong ng mga banta ng “EDSA 4” at kudeta. Ang kaseryosohan ng mga banta at plano ng mga grupong ito ay sinalamin ng pagpatay noong Disyembre 31, 2001 kay Lt. Baron Cervantes, isang dating myembro

ng YOU, konsultant ni Roilo Golez at kilalang tagasuporta ni Macapagal-Arroyo. Pinatahimik si Cervantes dahil ibinunyag niya ang mga planong kudeta laban sa rehimen.

Samantala, hindi rin nawawala ang banta ng grupong maka-Estrada. Hindi pa ganap na nasusugpo ang mga armadong tagasuporta ni Gen. Panfilo Lacson. Naiuulat na sangkot sina Lacson sa pag-aarmas at pagsasanay sa tinatawag na Urban Poor Army na kinasasangkutan ng maka-Estradang People’s Movement Against Poverty. Maging ang kampong Estrada ay nagbabanta ng paglulunsad ng panibagong pag-aalsang ala-EDSA.

Ang ilang mga reaksiyunaryong anti-Macapagal-Arroyo ay tumataya na rin sa lumalakas

na pagtutol sa tahasang armadong panghihimasok ng mga sundalong Amerikano. Binabatikos nina Sen. Juan Ponce Enrile, Rodolfo Biazon at iba pa sa reaksiyunaryong oposisyon ang pagpasok at planong pagtatagal ng paparaming sundalong Amerikano sa bansa bilang paglabag sa reaksiyunaryong konstitusyon at mga batas. Inilantad at binatikos din ni Imee Marcos ang lihim na kasunduang MLSA sa pagitan nina Gloria Macapagal-Arroyo at presidente George W. Bush ng US.

Maging sa hanay ng naghaharing koalisyon, may mga personaheng tulad nina dating Sen. Jovito Salonga at Sen. Joker Arroyo na matinding bumabatikos sa panghihimasok ng mga sundalong Amerikano sa bansa. **AB**



◀ ng rebolusyonaryong kilusan. Malinaw na kinakatigan at binabasbasan ni Macapagal-Arroyo ang itinakdang laro at direksyon ng mga militarista.

Lalong tumigas ang kanilang militaristang pusisyon dulot ng todo-suportang ibinigay ng papet na rehimen sa “kontra-terorismong” kampanya ng US at pagkakasali ng BHB sa listahan ng itinuturing ng US na mga terorista.

Muling pinigil ng rehimeng Macapagal-Arroyo ang nakatakdang pormal na pagpapatuloy ng usapang pangkapayapaan sa pagitan ng Gubyerno ng Republika ng Pilipinas (GRP) at National Democratic Front of the Philippines (NDFP) nitong Enero 7 sa Oslo, Norway. Sa halip, iginiit ng rehimen ang tuluy-tuloy na pagsasagawa na lamang ng tinatawag na *back channel talks* (impormal na usapan).

Inaasahan ni Macapagal-Arroyo na sa pamamagitan ng walang-taning na *back channel talks*, iikut-ikot na lamang ang usapan nang walang makabuluhang makakamit para sa rebolusyonaryong kilusan at mamamayan samantalang unti-unting mapahihina ang pusisyon at lakas ng NDFP. Nais ni Macapagal-Arroyo na sa The Netherlands na lamang ito gawin upang ipagkait sa NDFP ang pagkilalang diplomatiko ng gubyerno ng Norway at ng internasyunal na komunidad.

Inilalayo ng rehimen ang usapan sa atensyon ng publiko upang maging lingid sa mamamayang Pilipino ang superyoridad ng programa ng NDFP at ang pagiging makatarungan ng ipinapanukala nitong mga reporma. Sa kabilang banda, nais ng rehimeng na iwasan ang malantad sa mamamayan ang kabulukan at pagiging reaksiyunaryo ng umiiral na sistemang panlipunan na pinananatili at ipinagtatanggol nito.

Mulat ang NDFP sa mga layunin ng rehimen sa paglilimita nito sa usapan sa *back channel talks*. Inililina ng NDFP *negotiating panel* na hindi maaaring manatiling impormal ang usapan

nang walang taning at nang walang kapasyahang naaabot.

Upang bigyang-sikad ang usapan at hindi tuluyang mawala ang proseso ng pakikipagnegosasyong pangkapayapaan sa rehimeng Macapagal-Arroyo, nagbigay pa rin ng maluwag na puwang ang NDFP sa pleksibilidad kahit na maganit

ang GRP sa pagsalubong at pagtapat sa mga ito. Noong Nobyembre, sumangayon ang NDFP na sa Pilipinas na idaos ang mga pulong ng *reciprocal working committees on socio-economic reforms* (mga magkatapat na komiteng umaasikaso sa mga sosyo-ekonomikong reporma) kahit wala pang pormal na muling pagbubukas ng usapan. Noong Disyembre, pina-ngunahan ng NDFP ang hamon para sa pagsabay at pagkoordinang GRP at NDFP sa tigil-putukan. Dagdag dito, nagpahayag ng kahandaan ang NDFP na palayain ang mga bihag ng digma na nasa pangangalaga ng mga yunit

ng BHB sa Dulong Timog Mindanao. Sinangayunan ng NDFP ang isa pang serye ng impormal na usapan sa kagustuhang ituloy ang usapang pangkapayapaan at upang maipatupad man lamang ang Comprehensive Agreement on Respect for Human Rights and International Humanitarian Law o CARHRIHL at mabuo ang Joint Monitoring Committee para rito.

Ginawang kundisyon ng rehimen sa pagsangayon nito sa pagbabalik ng pormal na usapan ang pag-iisa na lamang ng pag-uusap tungkol sa tatlong nalalabing adyenda para umano’y humantong sa iisang kasunduan na lamang. Taliwas ito sa The Hague Declaration na nagtakda ng pagkakasunodsunod ng apat-na-puntong substantibong adyenda (karapatang-tao at internasyunal na makataong batas, mga sosyo-ekonomikong reporma, mga konstitusyunal at pampulitikang reporma at, panghuli, dispusisyon ng mga pwersa at tigil-putukan). Mangangahulugan ito ng mas mahabang proseso ng pormal na usapan bago pa man may makamit na mapagpasyang kasunduan at mga makabuluhang benepisyo mula sa usapan. **AB**



*Paglapastangan sa prinsipyo  
ng pambansang kasarinlan*

## **Nanganganib ang pagpapatuloy ng usapang pangkapayapaan**

Matapos ilang buwang sagkaan ang pagsulong ng usapang pang-kapayapaan, tuluyan na itong isinaspanganib ng rehimeng Macapagal-Arroyo bunsod ng pagpapapasok nito ng daan-daang tropang Amerikano sa loob ng teritoryo ng Pilipinas.

Ang bagay na ito, pati na ang ipinakitang kawalan ng interes ng rehimeng Macapagal-Arroyo sa usapang pangkapayapaan, ay isinasaaalang-alang ngayon ng Pambansang Konseho ng National Democratic Front. Pagpapasyahan ng NDF kung itutuloy pa o hindi ang pakikipagnegosasyon nito sa gubyerno ni Macapagal-Arroyo.

Isinasaad sa The Hague Joint Declaration ng 1992, ang dokumentong naglalatag ng mga saligang alituntunin sa pagdaraos ng usapang pangkapayapaan, na isa sa mga prinsipyong kapwa itataguyod ng dalawang panig sa usapan ay ang prinsipyo ng pambansang kasarinlan. Ang pagpapasok sa mga tropang Amerikano sa teritoryo ng bansa ay tahasang paglapastangan ng rehimen sa prinsipyo ng pambansang kasarinlan.

Isa itong hakbanging mas masahol pa sa ratipikasyon ng Visiting Forces Agreement noong 1998 na naging dahilan sa likod ng pagpapasya ng NDF na itigil ang usapang pangkapayapaan sa rehimeng Estrada sa parehong taon. **AB**

## **Ang panunumbalik: Armadong panghihimasok ng imperyalismong US sa Pilipinas**

*Tahasang nilalapastangan ng armadong panghihimasok ng imperyalismong US ang pambansang soberanya ng Pilipinas. Binabalewala rin nito ang mahabang kasaysayan ng paglaban ng mamamayang Pilipino sa dayuhang interbensyon at okupasyon. Hinihimok nito ang malawakang pagkamuhi at pagkilos ng mamamayan laban sa imperyalismong US at sa papet at pasistang rehimeng Macapagal-Arroyo. Isang malaking hamon para sa sambayanan ang mapatalsik sa pinakamaagang panahon ang lahat ng dayuhang tropang kasalukuyang nakabase sa bansa.*

*Alinsunod sa panawagan ng Komiteng Tagapagpaganap ng Komite Sentral na matamang subaybayan, labanan at biguin ang armadong panghihimasok ng imperyalismong US sa bansa, inilalathala ng AB ang mahahalagang usapin at pangyayari kaugnay ng pagbabase ng mga dayuhang tropa rito at ang nagbabadyang mas malawak at masahol na agresyong militar.*



### **Mga tropang Amerikano**

## **Muling nagbabase sa Pilipinas**

**L**antaran at tumitindi ang armadong panghihimasok at agresyon ng imperyalismong US sa bansa. Gamit ang balatkayong “military exercises”, kasalukuyang ipinupuslit sa bansa ang 160 Special Forces at dagdag na 500 o isang buong batalyon ng sundalong Amerikano. Sa kasalukuyan, ito ang pangalawang pinakamalaking pagdeploy ng mga Amerikanong tropa sa labas ng US kasunod ng Afghanistan.

Inangkin ng imperyalismong US ang karapatang panghimasukan at yurakan ang soberanya ng mga bansa sa ►



◀ ngalan ng pagsugpo sa itinuturing nitong mga “terorista”.

Magbabase ang naturang batalyon sa Zamboanga City sa loob ng anim na buwan. Ngunit ayon na rin sa mga upisyal militar, maaaring tumagal ito hanggang isang taon kung di pa nasusugpo ang mga “terorista”. Noong nakaraang taon, may nauna nang dumating na 26 na US Special Forces sa Basilan. Nitong Enero, umabot na sa 65 sundalo ang nasa Zamboanga City. Mayroong 14 na nasa Cebu habang ang 400 ay panimulang nakabase sa Clark Airfield, Pampanga. Mahigit 1,200 sundalong Pilipino ang lalahok sa mga “pagsasanay”.

Dahil mahigpit na ipinagbabawal maging ng reaksyunaryong konstitusyon ang pagbabase sa bansa ng mga dayuhang tropa, kung anu-ano ang ikinakatwiran ng guberno ni Macapagal-Arroyo upang palabasing lehitimo ang presensya ng mga sundalong Amerikano. Ang mga tropang Amerikano ay magsisilbi umanong mga “tagapayo” at “tagapagsanay” sa Armed Forces of the Philippines (AFP) sa mga operasyon nito laban sa Abu Sayyaf at sa paglaban sa terorismo.

Sinasabi ring lalahok lamang sila sa magkasanib na pagsasanay kasama ang mga pwersa ng AFP sa ilalim ng Kalayaan-Aguila 2002 at Balance Piston 02-1. Hindi raw tuwirang lalahok sa kombat ang dayuhang mga tropa ngunit papasok ang 160 Special Forces sa mga larangan ng kombat sa Basilan. Binigyan naman sila ng karapatang magpapatok “kung sila mismo ang pinapuputukan”. Sinasabing layunin din nila ang pagbawi sa dalawang Amerikanong bihag na walong buwan nang hawak ng Abu Sayyaf, bagamat magpapatuloy pa rin sila kahit mabawi na ang dalawang bihag. Bahagi rin umano ng “pagsasanay” ang paglulunsad ng mga operasyong *psywar* tulad ng mga aksyong sibiko at sosyo-ekonomikong proyekto.

Lantaran na at walang pakundangan ang pagsagasa ni Gloria Macapagal-Arroyo sa mga itinakdang proseso at limitasyon kahit ng reaksyunaryong mga batas. Hindi lubusang mabigyan



ng ligal na katwiran ng rehimen ang pagpasok ng mga tropang Amerikano. Maging ang mga probisyon ng Mutual Defense Treaty (MDT) at ng Visiting Forces Agreement (VFA) ay pilit na binabaluktot ng rehimen upang masabing ligal ang pagpasok ng mga tropang Amerikano. Pinakahuling ginagamit ng rehimen na katwiran ang Mutual Logistics Support Agreement (MLSA), na sikretong inareglo ni Macapagal-Arroyo at George W. Bush noong Nobyembre. Sa

katapus-tapusan, iginiit pa ni Macapagal-Arroyo na maaaring maging ligal pa rin kahit magpapasok sa bansa ng mga sundalong Amerikano na sadyang pangkombat—bagay na ikinagagalit ng maging ng mga kapartido niya, tulad ni Sen. Joker Arroyo. **AB**

### Pagtutol sa pagpasok ng mga armadong tropa ng US, lumalawak

**M**abilis na lumalawak ang pagkakaisa at pagtutol ng mamamayan laban sa pagpasok ng mga tropang Amerikano sa Pilipinas.

Simula nitong ikalawang linggo ng Enero, sa pangu-nguna ng mga patriyotikong organisasyong sa ilalim ng Bagong Alyansang Makabayan, halos araw-araw na nagdaraos ng kilos-protesta sa harap ng embahada ng US, sa Malakanyang at sa iba’t ibang lugar sa buong bansa. Kasabay nito, buong larga ang mga organisasyon ng mga manggagawa, magsasaka, estudyante, kabataan, kababaihan at iba pang mga demokratikong sektor sa paglililaw ng mga isyu at paninindigang patriyotiko laban sa pagpasok ng mga sundalong Amerikano sa bansa.

Tulad ng inaasahan, malu-pit ang naging tugon ng rehimeng Macapagal-Arroyo sa mga kilos protestang ito. Ginagamit nito ang mga pwersa ng pulisya at militar upang itaboy ang mga demonstrador na nagresulta sa pagkakasugat nila.

Pilit na inilalarawan ni ►



*Mutual Logistics Support Agreement*

## Bagong katawagan, lumang kasunduan

Ang Mutual Logistics Support Agreement (MLSA) ang pinakabagong katawagan sa Acquisition and Cross Servicing Agreement (ACSA), isang borador na kasunduang itinutulak ng US mula pa noong 1992 subalit hindi pinirmahan dahil sa mariing pagtutol ng mamamayan at maging ng ilang reaksyunaryong pulitiko.

Nang bumisita sa US si Macapagal-Arroyo noong Nobyembre, paspasang binuo nila ni George W. Bush ang MLSA. Noong simula'y inilihim ito sa publiko at pilit na itinanngi ng Malakanyang na may ganitong kasunduan.

Ngayong nabunyag na, inilulusot ito ni Macapagal-Arroyo bilang isang simpleng “aregluhan” sa pagitan ng mga kagawaran ng pambansang depensa ng US at Pilipinas. Ayaw nilang tawagin itong kasunduan upang umiwas sa masalimuot na proseso ng pagpapatibay muna sa Senado, ayon sa nakasaad sa reaksyunaryong konstitusyon. Pinirmahan ito ni Gen. Diomedio Villanueva, hepe ng AFP at ni Adm. Dennis Blair, kumander ng US Pacific Command. Ngunit ayon kay Villanueva, pinirmahan nila ito bilang “borador” lamang.

Ang patraydor na pagpapatibay ni Gloria Macapagal-Arroyo sa MLSA ay tahasang pagbasura sa tagumpay ng ilang dekadang



pakikibaka ng mamamayang Pilipino para patalsikin ang mga base militar ng US. Sa pamamagitan ng MLSA, palihim na ibinabalik ng rehimeng Macapagal-Arroyo sa US ang karapatang magmantine ng mga base militar at tropa sa bansa, kapalit ng kakarampot na ayuda at kagamitang militar mula sa US.

Sa ilalim ng MLSA, bibigyan ng “suportang pambase” at hahayaan ang mga sundalo ng US na gamitin ang Clark, Subic at anupamang bahagi ng Pilipinas para sa kanilang mga layuning militar.

Mas masahol pa, binibigyang-laya nito ang imperyalismong US na ibayong yurakan ang soberanya ng Pilipinas at panghimasukan ang mga internal na usapin nito sa pamamagitan ng pagtatalaga rito ng mga tropang militar na tutugis sa mga pwersang itinuturing nitong banta sa interes at seguridad ng US. **AB**

*(Tingnan ang kaugnay na artikulo hinggil sa ACSA, “Paggamit sa bansa bilang base militar, patuloy na iginigiit ng US”, AB Hulyo 2001)*

◀ Macapagal-Arroyo na pabor ang mamamayan sa pagpasok ng mga tropang Amerikano. Katulad ng pasistang diktadurang Marcos, desperadong ginagamit ngayon ng rehimen ang anti-komunistang pananakot at tinataguriang “komunista” ang lahat ng tumututol sa panghihimasok ng US.

Gayunman, hindi mapigilan

ni Macapagal-Arroyo ang pagsiklab at muling paglaganap ng damdaming makabayan ng mamamayan. Sa buong bansa, inilulusad ang mga porum, konsultasyon at mga pagtitipon upang hinangin ang malawak na patriyotikong nagkakaisang prente.

Ngayon pa lamang ay aktibong nag-uusap at nagtutulungan

na ang iba't ibang mga patriyotikong pwersa at personahe kabilang si dating senador Wigberto Tañada at Nini Quezon-Avanceña. Nagkokoordina ngayon ng mga pagkilos sa buong kapuluan simula sa araw ng pag-uumpisa ng Balikatan 02-01 na nakatakda sa Enero 31 sa kabila ng mga kontrobersya at mga protesta. **AB**



## Di mapagtakpan ang mga pang-aabuso ng 5<sup>th</sup> ID sa Isabela

Sa mga pahayag na inilabas noong Disyembre 10, 2001, inilantad ni Ka Salvador del Pueblo, tagapagsalita ng PKP-BHB-NDF sa Hilagang Silangang Luzon at ni Ka Delio Baladon, tagapagsalita ng Benito Tesorio Command (BTC) ng BHB ang mga kasinungalingan ni Brig. Gen. Rodolfo Alvarado ng 5<sup>th</sup> ID sa Isabela.

Pilit na itinatago ni Alvarado ang paglapastangan ng mga tropa ng 5<sup>th</sup> ID sa karapatang-tao ng mamamayan sa mga operasyon ng dibisyon sa Hacienda Sta Isabel sa Ilagan; Vintar, Dolores at San Macario sa Quirino; sa Germitan, Dibulod, Namnama at karatig baryo sa bayan ng Jones; Madadamman, Diasan, Villa Campo, Narra at karatig baryo sa bayan ng Echague.

Kabilang sa mga pinagtatakpan ni Alvarado ang mga naitalang kaso ng mga sundalo—pagbabawal na magsaka, sapilitang pagpapagiya, pananakit sa kabataan at matatanda, pagbabase sa mga eskwelahan at kabahayan ng masa, gabi-gabing paglalasing at pagsusugal at ilang kaso ng pambabastos sa kababaihan.

Naglubid ng mga kwento si Alvarado sa mga panayam sa kanya sa radyo. Pilit niyang

ikinukubli ang mga paglabag sa karapatang-tao sa Ilagan at Quirino at ang pang-aabuso ng mga tropa ng 5<sup>th</sup> ID na pinamumunuan nina Captain Marana, Lieutenant Betinol at Lieutenant Gay sa mga taga-Villa Bello, Jones. Ani Alvarado, wala diumanong batayan ang mga ibinunyag ng BTC hinggil sa mga kaso ng panggugulo at paglabag ng 502<sup>nd</sup> Brigade sa mga

operasyong pangkombat ng may 200 tropa ng 502<sup>nd</sup> Brigade ng AFP sa panahon ng idineklarang tigil-putukan ng rehimeng Macapagal-Arroyo noong Disyembre 10, 2001 hanggang Enero 6, 2002. Sinaklaw ng mga operasyong ito ang mga baryo ng Echague at Jones.

Pawang panlalansi sa mamamayan ang mga isinasaboy na kasinungalingan ni Alvarado.

Tulad ng mga operasyong militar sa iba pang mga prubinsya sa bansa, itinatago ang bangis ng kaaway sa Isabela sa pamamagitan ng mga *civil-military operation* tulad ng pagsasaayos ng mga daan; pagta-tayo ng mga pergola (*waiting shed*) at kubeta; pagtutuli at paglulunsad ng *mass wedding*. Kinakasangkapan ang mga gawa-ing ito upang magpanggap na may intensyong mabuti kasabay ng paglapastangan sa mamamayan.

Ayon sa pahayag ni Kasamang Baladon, “hindi nagkataon lamang kung habang may militar na gumagawa ng kubeta sa Barangay Diasan, may militar ding nanggaladkad at nanggagapos ng magsasaka sa Barangay Villa Bello!” **AB**



karapatang-tao ng mamamayan. Ito ay sa kabila ng malinaw na mga ebidensya sa mga kasong inihapag ng mga magsasaka sa Barangay Villa Bello at ng mga nagsagawa ng *fact finding mission* sa lugar noong Nobyembre.

Idinagdag pa ni Kasamang Baladon na nagpatuloy ang mga



## MGA BALITA

### 2 SUNDALO PATAY SA SAGUPAAN SA ZAMBOANGA DEL SUR

Dalawang sundalo ang namatay at isang CAFGU ang nasugatan nang maki-pagsagupaan ang mga tropa ng 51<sup>st</sup> IB sa Bagong Hukbong Bayan (BHB) sa Barangay Mahalingob, Lapuyan, Zamboanga del Sur noong Enero 3. Naglulunsad ang mga sundalo ng operasyong militar sa kabila ng deklaradong tigil-putukan sa Kapaskuhan, nang makaengkentro ng mga ito ang BHB.

### DATING PC, PINARUSAHAN NG BHB SA SORSOGON

Ginawaran ng BHB ng parusang kamatayan ang isang dating myembro ng Philippine Constabulary (PC) sa bayan ng Irosin, Sorsogon nitong Enero 27 ng umaga.

Pinarusahan ng BHB si Igmedio Panti Sr., 60, dahil sa mahabang rekord nito ng pagmamalupit at pagpapahirap sa mga residente ng Barangay Gulang-gulang, Irosin, sapul noong panahong siya ay nasa PC pa.



## 5<sup>TH</sup> ID, SANGKOT SA ILLEGAL LOGGING

**P**inagtatakpan ni Brig. Gen. Rodolfo Alvarado ang pagkakasangkot ng 5<sup>th</sup> ID sa *illegal logging* sa Diden sa hangganang San Mariano-San Guillermo, Isabela. Buong kasinungalingan nitong ipinangangalandakang naroroon ang kanilang tropa upang pigilan ang pagtotroso ng BHB.

Sa pahayag na inilabas ni Kasamang Salvador del Pueblo noong Disyembre 8, 2001, sinabi niyang ginagamit ang 5<sup>th</sup> ID ng malalaking kapitalista sa pagtotroso tulad ng pamilya Dy sa Isabela. Nagsisilbi silang gwardya ng mga *sawmill*. Tagapagbantay din sila ng mga labasan ng mga troso sa Maconacon, Dinapigue; Masipi, Cabagan; at San Mariano sa prubinsya ng Isabela; at sa Rizal, Lasam, Piat, Sto. Niño at Baggao sa prubinsya ng Cagayan. Ginugwardyahan nila sa byahe ang mga trak na may kargadang tablon at troso.

Limpak-limpak ang kinikita ni Alvarado at ng kanyang mga tauhang kasapakat sa payola mula sa iligal na pagtotroso. Daan-daang libo ang kanilang kinikita sa mga “nakukumpiskang” kahoy. Hindi lingid sa masa na mas mababa kaysa

sa aktwal na bilang ng mga kahoy ang iniuulat ng mga tauhan ng 5<sup>th</sup> ID sa lingguhang programa ng militar sa radyo.

Ani Kasamang del Pueblo, “ang New People’s Army ay mahigpit at lubos na nagbabawal sa *logging* ng malalaking kapitalista at imperyalista sa mga lugar na may sapat nang inabot na lakas sa pulitika at militar ang Partido, Hukbong Bayan at Demokratikong Gubyernong Bayan.”


Ang tanging pinahihintulutan, aniya, ay ang pagtotroso para sa pagtatayo ng bahay ng mamamayan sa lugar at pambenta ng mga may pangangailangang pangkagipitan. Ang mga ito ay dapat may kaukulang pahintulot ng mga komite ng Partidong may saklaw sa lugar.

Ayon din kay del Pueblo, “para sa rebolusyonaryong kilusan, ang kagubatan at kalikasan ay dapat na pangunahing magsilbi sa interes ng mamamayan. Ipinagtatanggol at pinangangalagaan ito alang-alang sa kapakanan, pangangailangan, kaligtasan at kinabukasan ng kasalukuyan at susunod na henerasyon ng masa ng sambayanan.” **AB**




### PAGPATAY SA ISANG MEYOR NG ABRA, DI KAGAGAWAN NG BHB

Pinabulaanan ng Chadli Molintas Command (CMC) ng BHB sa Kordilyera na sila ang pumatay kay Jose Segundo, alkalde ng Tubo, Abra, noong Disyembre 27, 2001. Sinabi ng CMC na mahigpit silang tumalima sa patakarang ng NDF sa pansamantalang tigil-putukan. Gayunman, sinabi ng kumand na sadyang maraming kasalanan laban sa mamamayan ng Tubo si Segundo at marami itong naging kaaway. Kabilang sa mga krimen ni Segundo ang panggagahasa sa kababaihan. Ipinahayag ng BHB na talagang nakatakda na ang pagpaparusa sa abusadong alkalde.



### LAND OCCUPATION SA STANFILCO, INILUNSAD

Mahigit 150 mang-gagawang bukid na nagtrabaho sa Stanfilco Company ang nag-okupa ng pitong ektaryang taniman ng saging noong Enero 14 sa Panabo City, Davao del Norte. Ang Stanfilco, na nagmamay-ari ng 1,004-ektaryang taniman ng saging ay isang multinasyunal na kumpanya na subsidyaryo ng Dole Philippines. Ang lupang inokupa ng mga magsasaka ay bahagi ng 134-ektaryang ibinukod para tamnan ng palay sa ilalim ng Comprehensive Agrarian Reform Program (CARP) noong 1991. Kamakailan ay iligal na binawi ng Stanfilco ang lupa para tamnan muli ng saging. Nagbanta ang mga magsasaka na mag-ookupa pa sila ng mas malawak na lupain kung hindi tutugunan ng Stanfilco ang kanilang karapatang magkaroon ng lupang tatamnan ng palay.



### MGA KAMOTENG KAHoy, BINUNOT SA NURSERY NG SMC SA ISABELA

Pinagbubunot ng mga magsasaka ang mga tanim na kamoteng kahoy sa isang ektaryang *nursery* ng San Miguel Corporation (SMC) sa Barangay Santiago, Quirino, Isabela nitong huling linggo ng Enero. Tinututulan ng mga magsasaka ang iskema ni Eduardo “Danding” Cojuangco, may-ari ng SMC, na gawing taniman ng kamoteng-kahoy ang 150,000 ektarya sa 12 bayan ng Isabela. Aabot sa 500 ektarya ang gagawing *nursery* para sa kamoteng kahoy.

### IKA-15 ANIBERSARYO NG MENDIOLA MASSACRE, GINUNITA

Ginunita ng libu-libong magsasaka at iba pang sektor ang ika-15 anibersaryo ng Mendiola Massacre nitong Enero 22 upang igiit ang katarungan para sa lahat ng magsasakang biktima ng paglabag sa karapatang-tao. Nagrali sa Mendiola at embahada ng US ang mga magsasaka sa pamumuno ng Kilusang Magbubukid ng Pilipinas at Kilusang Enero 22. Mariin nilang kinundena ang pag-igting ng pasismo laluna sa ilalim ng sagadsaring papet na rehimeng Macapagal-Arroyo.



Mahigit 300 myembro naman ng Bagong Alyan-sang Makabayan, Bayan Muna at iba pang mga militanteng grupo ang nagrali sa Nueva Ecija upang igiit ang katarungan para sa 17 magsasakang biktima ng Lupao Massacre noong 1987 at pito pang biktima ng pagpatay ng AFP nitong mga nakaraang buwan sa Pantabangan at General Natividad.





### RALI NG MGA KATULONG SA HONGKONG, PINAMUNUAN NG MGA PILIPINO

Sa pamumuno ng United Filipinos in Hongkong, organisasyon ng mga Pilipinong *domestic helper*, idinaos ang pinakamalaking rali ng mga Pilipino sa Hongkong noong Enero 13 laban sa pagbabawas ng sweldo ng mga katulong doon.

Iginiit ng libu-libong mga katulong mula sa Pilipinas, Indonesia, Nepal, Sri Lanka at Thailand na nagmartsa sa mga lansangan ng Hongkong ang pagmantine ng sahod (*wage freeze*) na inaprubahan noong 1999 matapos dumanas ng matinding resesyon ang Hongkong. Ang minimum na sahod ng mga katulong na HK\$3,670 ay balak bawasan tungong HK\$3,120 hanggang HK\$2,876 pagsapit ng Pebrero 1. Mahigit 152,000 Pilipino at 66,000 Indones ang apektado ng pagbawas sa sahod.

### MAHIGIT 3,000 MANGGAGAWA SA 186 KUMpanya TATANGGALIN SA TRABAHO

Unang buwan pa lamang ng taon, inanunsyo nang 3,075 mga manggagawa mula sa 186 na kumpanya ang matatanggal sa trabaho. Umabot sa 2,232 manggagawa ang tatanggalin mula sa 161 kumpanya habang 843 ang masisisante dahil sa pagsasara ng 25 negosyo dulot ng matinding krisis sa ekonomya. Pinakamalaking bilang ng mga mawawalan ng trabaho ay mula sa National Capital Region (2,268). Kabilang sa mga magtatanggal ng mga manggagawa ang Coca-Cola Bottlers Phil. (325), Royal Match (229) at ABS-CBN (150).

Sa kaugnay na balita, nagwelga ang 800 manggagawa ng Nestlé Philippines sa Cabuyao, Laguna nitong Enero 14 upang tutulan ang plano ng kumpanyang tanggalin ang 30% ng pwersang paggawa at igiit ang karapatan nilang tumanggap ng *cash pension* at iba pang benepisyo.



### KATIWALIAN SA P10 BILYON PEACE BONDS, INUNGKAT

Naungkat sa pagdinig sa Senado noong Enero 29 ang mga detalye tungkol sa katiwalian kaugnay ng P10 bilyon *treasury bonds* (mga bono na inilalabas ng pambansang ingat-yaman) na tinatawag na Poverty Eradication and Alleviation Certificates o PEACe bonds. Kumita ang CODE-NGO ng P1.4 bilyon mula sa pagbebenta ng RCBC ng PEACe bonds; ang RCBC, P300 milyon, at ang Capex Incorporated at ibang mga tagapayong pampinansya ng CODE-NGO, P100 milyon. Sangkot sa katiwalian ang National Treasurer na si Sergio Edeza, ang Finance Secretary na si Jose Isidro Camacho at kapatid niyang tagapangulo ng CODE-NGO na si Marissa Camacho-Reyes.

Ang CODE-NGO ay isa sa mga pangunahing NGO na ginagamit ng mga sosyal demokrata para sa panlilinlang sa mamamayan at pangungurakot ng pondo mula sa mga pandaigdigang ahensyang tumutustos sa mga sosyo-ekonomikong proyektong ipinapanukala ng mga NGO sa iba't ibang bansa.

### PERA NG BAYAN, NILUSTAY NG MGA MAMBABATAS

Aabot sa P1.34 bilyon ng pera ng bayan ang ginugol ng 22 senador at 222 kongresmen noong 2000. Ang Senado ay nakagastos ng P249 milyon samantalang ang Kongreso ay gumastos ng P1.09 bilyon. Ang pinakamalalaking gastador sa Kongreso ay sina Mamintal Adiong ng Lanao del Sur (P6.8 milyon) at Abdullah Mangotara ng Lanao del Norte (P6.3 milyon). Gumastos ng abereyds na P5 milyon ang isang kongresman. Sa Senado, ang pinakamagastos ay ang mga pro-Estradang sina Vicente Sotto (P12.92 milyon), Robert Jaworski (P12.30 milyon), Anna Dominique Coseteng (P12.28 milyon), Juan Ponce Enrile (P12.20



## MGA BALITA

milyon), Francisco Tatad (P12.05 milyon) at Blas Ople (P12.04 milyon). Gumugol din ng P1.8 milyon ang mga mambabatas para sa sahod ng mga kawani at mga “konsultant” na kadalasa’y mga kamag-anak nila.

### PAMPUBLIKONG ARI-ARIAN PALUGING IBINENTA SA DAYUHANG BANGKO

Pinirmahan ng rehimeng Macapagal-Arroyo at Lehman Brothers Asia nitong Enero 12 ang “Philippine Recovery Fund”, isang kasunduang popondo sa mga proyekto ng gubyrno kapalit ng mga *non-performing loans* (NPL) at pag-aari ng estado kabilang na ang mga lupaing pampubliko.

Sa ilalim ng kasunduan, paluging ibinenta ng rehimeng Macapagal-Arroyo ang P611 bilyong pag-aaring publiko kapalit ng kakarampot na halagang P50 bilyon (\$1 bilyon). Ang naturang P611 bilyong halaga ng ari-arian ay binubuo ng P461 bilyon NPL na mga sangla (*mortgages*) at lusing negosyo ng gubyrno sa mga proyektong pabahay at P150 bilyon narematang ari-arian (*foreclosed properties*).

Ang Letter of Intent ng \$1 bilyong kasunduan ay pipirmahan ng naturang bangko at ni Macapagal-Arroyo sa Pebrero 3 pagbisita niya sa US.

### PAGKALUGI NG MGA KUMPANYANG U.S., LUMALAWAK

Dumadami ang mga kumpanyang US na nagdedeklara ng pagkalugi sa gitna ng resesyong bumabayo sa US. Noong 2001, umabot sa 251 negosyong US ang nalugi. Noong 2000, umabot lamang sa 176 ang mga nabangkrap. Kalakhan sa mga nalugi ay nasa sektor ng telekomunikasyon at sa kompyuter. Kabilang na sa nabangkrap ang pinakamalaking kumpanya ng enerhiya sa US, ang Enron, na may \$63 bilyon na pag-aari.

Ang kabuuang pag-aari ng mga nangaluging industriya ay aabot ng \$254 bilyon, mas mataas nang tatlong beses sa nakaraang taon. Nagbabadya

ito ng pagdami ng bilang ng manggagawang mawawalan ng trabaho at paghila sa mga kaakibat na industriya sa lalo pang pagkalugi. Ayon sa mga ekonomista, walang nababanaag na pagsigla sa ekonomya ng US sa unang dalawang kwarto ng 2002.

### KUMPANYANG DI NAKABAYAD NG UTANG, DUMAMI SA 2001

Lumaki ang bilang ng mga kumpanyang di nakapagbayad ng utang noong nakaraang taon. Umabot sa 211 kumpanya na may kabuuang \$115.4 bilyon utang ang nagdeklarang di makababayad, ayon sa Standard and Poor’s, isang ahensyang US na gumagawa ng mga pagsusuri sa ekonomya ng mga bansa.

Pinangungunahan ng US ang mga di nakapagbayad, sa pag-abot nito sa 162 *default* o di pagbayad sa takdang panahon. Kalakhan ng mga di nakapagbayad ng utang at nag-*default* ay nasa industriya ng telekomunikasyon. Sa Argentina, kabilang ang 10 bangko sa mga di nakabayad ng utang dahil sa krisis pang-ekonomya.

## PABATID

Simula noong katapusan ng Disyembre, ang website ng **Ang Bayan** sa

<http://www.angbayan.org>

ay dumanas ng problema at pansamantalang hindi magagamit.

Habang hindi pa ito muling naibabalik, maaari ninyong makuha ang kopya ng **AB** sa pamamagitan ng *email*. Magpadala lamang ng blangkong *email* sa *address* ng edisyong nais ninyong tanggapin:

[angbayan\\_updates\\_pilipino\\_subscribe@yahoogroups.com](mailto:angbayan_updates_pilipino_subscribe@yahoogroups.com)  
[angbayan\\_updates\\_english\\_subscribe@yahoogroups.com](mailto:angbayan_updates_english_subscribe@yahoogroups.com)  
[angbayan\\_updates\\_bisaya\\_subscribe@yahoogroups.com](mailto:angbayan_updates_bisaya_subscribe@yahoogroups.com)  
[angbayan\\_updates\\_hiligaynon\\_subscribe@yahoogroups.com](mailto:angbayan_updates_hiligaynon_subscribe@yahoogroups.com)  
[angbayan\\_updates\\_ilocos\\_subscribe@yahoogroups.com](mailto:angbayan_updates_ilocos_subscribe@yahoogroups.com)